



**Kalaallit Nunaanni pinerluttulerinermi inatsisip aamma Kalaallit Nunaanni eqqartuussisarnermik inatsisip allangortinneqarnerat pillugit inatsisip (Malersuineq akiorniarlugu suliniutit patajaallisaavigineqarnerat, kinaassutsimik atornerluinerup pinerluutinngortinneqarnera aamma unnerluussuteqarnissamut piffissaliussap unitsinneqarnera il.il.) pillugu missingiutip Kalaallit Nunaanni Namminersorlutik Oqartussanit akuersissutigineqarnissaa pillugu Inatsisartut aalajangiiffigisassaattut siunnersuutip aamma Qanilleqqusinnginneq, najugaqataasinnangineq aamma anisitsisarneq pillugit inatsisip allangortinneqarnera pillugu inatsisip assigiinngitsut Kalaallit Nunaannut atuutilersinneqarnissaat pillugu peqqussutissamut missingiut**

(Inuussutissarsiornermut, Niuernermet, Aatsitassanut, Inatsisip Atuutinneqarnerannut Naligiissitaanermullu Naalakkersuisoq)  
(Siullermeerneqarnera)

Ullumikkut siunnersuut una siunertagissaartoq isummerfigilerparput. Akornusersuisarneq / malersuineq akiorniarlugu suliniutit annertusarnissaannik aammalu pinerluutinngortinneqarnissaanut unnerluussuteqarnissamut piffissaliussap unitsinneqarnissaanut siunnersuut isumaqatigalugu oqaaseqareerlana, pingaaruteqarmat pisariaqarlutillu innuttaasutsinnut tamanut toqqissisimasumik isumannaatsumillu inuiaqatigiinni akuunissamut sulissuteqassalluta.

Siullermik pingaartut erseqqissaatigissavara, malersuineq, kinaassutsimut atornerluineq aammalu unnerluussuteqarnissamut piffissaliussat inatsisitiguiinnaq politikikkuiinnarlu apeqqutaanngimmata. Tassami inuuniarnikkut inuttullu unammillernartuupput, innuttaasut toqqaannartumik ulluinnaannut eqquisartut. Kinaluunniit malersorneqarpat, kiffaanngisusaat toqqissisimanerallu tatineqartarpoq. Taamatut pinerlunnerit imaannaanngitsut piffissarititaasut sakkortuut pissutigalugit iliuuseqarfigineqarsinnaanngikkaangata, narrutsassimanermik pilersitsisarpoq, naapertuilluarneq tamatigut ajugaaneq ajormat.

Malersuineq pissusilersorneruvoq, annertusigaluttuinnartumik inuiaqatigiitsinni ersiornermik toqqissisimannginnermillu pilersitsisartoq. Pingaartumik arnanik eqquisarpoq, aamma angutit eqqugaasinnaasarput, tamannalu tarnikkut timikkullu imaannaanngitsunik kinguneqarsinnaasarluni. Malersuinermet annertunerusumik akiuniarnerput kingunerissavaa, ersarissumik oqariartuuteqarnerput, akuersaanginnatsigu, inuit malersorneqarlutillu akornusersorneqartarnerat. Pinerluffigineqartut illersornissaannut tunngassuteqarpoq aammalu pinerluuteqartut piliaminnut akisussaatinneqarnissaannut. Inatsip nukittorsartariaqarparput, politiit pisariaqartitaminnik sakkussaqaarniassammata sukkasuumik eqaatsumillu iliuuseqarnissaminnut, aammalu malersuisut akornusersuisarnerannut kinguneri paasiniassammatigit.

Silarsuatsinni digitalinngoraluttuinnartumi ajoraluartumik kinaassutsimik atornerluisartut amerligaluttuinnarput. Inuk kinaassutsiminik atornerlunneqarsimasoq, inuttut paasissutissaatai kinaassusaalu tillinneqartarput atornerlunneqarlutillu, tamannalu aningaasatigut inuttullu



innarlerneqarnermik kinguneqartarluni. Taamaattumik kinaassutsimik atonerluinerup pinerluutinngortinneqarnera pinerloriaatsit nutaajunerusut ilungersuutigineqarnerinnaanik pissuteqanngilaq – aammali innuttaasut namminneq inuuneqarsinnaanerannik illersuisuussaaq taamatullu qarasaasiatigut illersorneqarnissaannut. Piffissanngorpoq, inatsisiliatta nutarterneqarnissaat unammillernartunut malinnaaniassagatta, digitalimik inooriaaseqalernitta kingunerisaanik.

Eqqaamatigu, suliniut, maannakkut saqqummiunneqartoq, silaannarmiit tigusaanngimmat. Siusunnerusukkut suliatinnut pissusissamisoortumik nangitsineruvoq aammalu pisussaaffitsinnik erseqqisaanerulluni, Istanbul-imut isumaqatigiissutip atuutilertinneranut nunatta pisussaaffeqalerneranut, Demokraatiniit Inatsisartunut siunnersuuterput tunngavigalugu akuerineqartoq. Taanna atuutsilersitsineq suliamut alloriaqqinnermut pingaartuuvoq arnat aammalu navianartumik inissisimasut allat persuttaanermut atonerluinermullu illersorneqarnissaat nukittorsarumallugu. Istanbul-imut isumaqatigiissutip siunertaraa arnanik persuttaanerup angerlarsimaffimmilu persuttaanerup akiorneqarnissaa aammalu pinerlussimasut pinaveersaartinneqarnissaat, pineqaatissinneqarnissaallu illersorneqarnissaat qulakkiissallugu. Pisussaaffik pappialarsornerinnarmiinngilaq – tikkuussisussaavorli, qanoq inuiaqatigiinnik pilersitsissanersugut, kikkulluunniit persuttarneqarnissamik akornusersorneqarnissamillu ersiortinneqarlutik inuneqannginnissaannut.

Malersuinermut akiuinarluni suliniutip annertusarnera taamaattumik suliamut nangitsineruvoq pissusissamisoortoq, Istanbul-imut isumaqatigiissutip akuerinerani. Alloriaqqinnissat tullii akisussaaffigaagut piviusunngortissallugit innuttaasunut neriorsuutigisagut, persuttaanermut atonerlunneqarnissamullu illersorniarlugit oqariartuuteqarnermi.

Tusarniaanermut akissutaasut assigalugit, erseqqissarusupparput pisariaqartoq, amerlanerusunik aningaasaliinissap pingaaruteqassusaa suliniutit pitsaasut, politiit suliaasa saniatigut suliakkiutigineqartut, piviusunngortinneqarnissaannut.

Nunarput taassalersissanngilarput, akornusersuinermik, persuttaanermik kinaassutsimillu atonerluinermik kinguneqartitsisanngitsoq. Malersuinerup pinerluttunngorsarneqarneranut suliniutip annertusarneratigut aammalu qulakkeerneratigut, pinerluuteqarnerit sakkortuut inatsisitigut malersorneqanngitsoorsinnaannginnerannik nutaangilinissaannut piffissaliussat pissutaallutik, innuttaasut takutippagut, tunuliaqutaalluta. Takutipparput, isumannaassusaa kiffaanngissusaallu qanorluunniit uagutsinnut pingaaruteqarlunnartoq siunnersuutillu isumaqatigineratigut ataatsimoorluta pingaarutilimmik alloriassasugut naapertuilluernerup toqqissisimanerullu tungaanut.

Demokraatit siunnersuutip siunertai pitsaasut tapersersorpai ataatsimiititaliamilu aappassaaneerneqannginnerani suliarisassatut ingerlateqqinnissaa inersuullugu, tusarniaanermi akissutigineqartut isummersorfigineqarnissai kissaatigalugu.